


# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava  
Va ina kosmac !!

Alubeaksat ke 2023

7<sup>e</sup> otuk







## Vogelherd, arula ke Lekeraporugal

Vogelherd arula, tigisa koe Schwäbische Alb jakama getalte Germana, tir ayaf is abdi-izvugalaf debak ke Lekeraporugal.

### Tamavafa Gadakiewega

Belca dem tevoya abdiizvugalafa arula ( don Vogelherd arula ) milvemon tigisa getalte Germana va tano katcalapafo izvaxo ke tawava tadler nume bak 2007 wetce arayaf debak ke tamavafa gadakiewega ke UNESCO zo bendeyer.

### Winugafa pimtara ke UNESCO

Arula is yamba ke oprugalafe sare koe Schwäbische Alb jakama ( Vogelherd arula ). Taneaf wita ayik ko Europa weti 43000 tanda bak boca oprugal artlaniyid. Tano sinafo inkexo tiyir Schwäbische Alb jakama vagee Germana. Tevoya arula joxana mali 1860<sup>e</sup> sanda va stabrega guazafa gu 33000 ik 43000 tanda al razdad. Balumayan kudjot va sulem ( don arulaf krapol is melmakol is okol is jaftol ) is stalta is korafa ingaxa tulon zo trasiyid. Aryon kudjot volas va ayasulemaf tisik is kudjama va ayikya zo kosmayad. Bat rawopaf debak va volasa yamba tisa tana losavsafa ke tamava vrutad ise va koafira icde xanta ke ayafa yambafa vonera webed.

### Rawopaf debak

Koe Lone krant, Vogelherd arula tir tela lotaltefa tigisa. Tir dem baroyo kolanixo gluyakirafo gu lupaxa koe pistxo. Bata betsava varon zo vestayar ise zo kaljoxayar. Taneafa kosmara isu



divsidara bak 1930<sup>e</sup> sanda gan Gustav Riek is Hermann Mohn zo skuyud. Soe banugale divmimayan baspieks sure gire zo joxayad ise loeke zo drunayad.

Evlara va serixo ke Vogelherd arula va evlaks wali milgaf Lekeraporugal is Gelkeraporugal nekir. Kotak ke koafizayani seri vas jontik sulemaf kudjot ruldar, i vas lo epuyun kum melmakolafa wula. Bat kudjot va yona katca bliyisa bak oprugal volad, i va tulon arulaf krapol

## Kotavaf Izvugalayak [-800 – -700 : Pacifika is Ronefa Asia]

*Sinka is Anameda — Irubara is Vegedura — Ckane is Gandura — Yamba is Miga*

### BURMOTAROPANYA

Skeura ke jontik siniik va burmotaranya mali lekeugal zo slamer. Lana ezla suteyena bak -VII-eafa decemda va vexala dem yon fraf azekor ware re co rotorigin gu burmotaropanya dafur. Siniik va sinka ton « olk » ( zadaya ok denta ok plebota ) is azekor ( ara sinka dositasa va olk ta tupoara ) solzarteyed.

Bat nelkot koe Ronefa Asia kotliz galbuweyer. Katcalafa burmotarafa prostewa ke siniikeem golde bagalara mali lekeugal is gruperapa va ruxa is govitafa enga al tadlewer, is va aryona tadlexa dum kabay mal krimta is wivga ke valentefa tcabanera, is warzeks ke tawamidura mal istefa azekapa.



Ingayana anamkafa mikiya, Shanxi, Sinia

### MIKIYA TA KEPAITA

Mikiya kum burmeyena kuritca enekeon titisa gimbafa kira ke loa mona koe lentefa is istefa Sinia, va korid bak -VIII-eafa decemda toz ikarundayad. Kepaita tiyid besayana gu emacek dem anamkafa traozesa mikiya, don telyona domafa ingayana.



is melmakol is govitaf okol is dere nudol.

Ayakoraf kudjot is toloy stogoyeyen val is yona ingasa muka va olkotceem tukotrad. Evlara kan 14<sup>e</sup> beba al exoner da belikafa klaa ke bada ke Aurignac sare ke Vogelherd arula tir 35000 ik 41600 AR tanda.

Dum yona dzeta ke Hohle Fels arula, telyona ke Vogelherd arula va yona welmafa tcala ke rupolafa kotcara divnedid, i va tcala tisa pragucayan nekiks ke pist gan pragara ke arulaf rupol.

### Kudjotya ke Vogelherd

Kudjotya ke Vogelherd tir kudjot, is rotis ayikyaf kaatoeks, ke Abdiizvugal evlon gu Jotaf Lekeraporugal.

Kudjot kum talgava ke wafibol zo epuyur, weti 13000 tanda bak Madeleine Sare. Zo nirayar isen gije tir vas 6.9 cm-. In tir takiskaf isen alto vierdon zo kaatoeyer.

Kudjama bak 2008 zo kosmayar, drunason va fultey danes va joxara skuyuna bak 1931 gan Gustav Riek koe arula ke Vogelherd. Bat fultey al zo flanced numen konaka kudjama al zo trasiyid. Kudjotya ke Vogelherd nutir tela loon dulapafa. Tir roluntena gu aryona kudjotya ke Madeleine Sare ke Petersfels.



Kudjot kosmayan  
koe Vogelherd arula



*Nuyafa ewava male internetxo :  
<https://commons.wikimedia.org>*

Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/21/izvugalayak-800-700-ronefa-asia-is-pacifika/>

### WARFOKAF WITKOT

Xim ke witkot trasiyin valente Vietnam evlon gu -VIII-eafa decemda va telyona stabrega ke tota koe Geronefa Asia. Bat totuk ( tel logijaf tir abrotcaf vas 4.5 m- ) mal aalulim zo suxayad. Wetce warfok mu lanyon kulik zo malsaveyed.

Soe, ware lekeon, tota koe bata gola al zo vegeduyud : weti abdion 55 000 tanda, ayaf blay va Australia batkane al zomeyed ; loon noelton, aryona lospa va tursieem ke Pacifika Welfa batkane di kallapiyid, voxen va stabrega ke batyona losavsafa tota men al kosmayat.

### ZIKEYENA EDA

Bak -VIII-eafa decemda gejeda dem otcayan okol koe gazafa naboxa dile zo kotawayad. Bat irem kum inta tiyid dem iyekotaf ziradey vwon ice elbom, dem kuldarnard vwon is iyekotafa pozla vwon ice wast, isen okol gu iyekotaf kirmem is xatcaxa ikz- zo zikeyed

Iyekotafa kirma ta okol,  
Sinia







Tael koe kelt ixam vaticeon tigrir. Ault ke Rupolap Bitejeem toz blaganyar. Tap loloon dur. Dile, valenteon, bimilesen kadime ivamuacku ke orikaf rujod, teybriva ke artstis naelot ton afiga az afida sotcewed.

Lisanka va sok ke felisik ape vofar nume van yasaxo proyon is xelkason lakir. Makar, debanyes koe impadimot, wan viklar ise va bata cwaga wan dankagar. Dun kalir da va inta vas aluboy edavacek al ulir nume gan guazya fu zo alier. Mam ton ie is bre va larida divstid ; va miel gabentapon is grenyapon ticstid eke « diveik » ticlaniyis va kepaita ke skiderna budeteson va keldegayaxay, va intafa takra tupwertawesa is tukranavesa laizon pestaler. Wori Lisanka va impadimot mo denoxa al star lizu vema zo kosmar. Nolda leve taelaftapa stokewesa yozdar. Dile, bata afixa nugrirunkawer, nolda tuorikawer, voxen moion, randera ke naelot gire vamoönir. Bata betawesa tcaza va manafa keska dakid. Kotara noldanafa bria ke aalxo nuzekar : onton vannir, onton ilnir. Iste aalxo, Makar va usukiskafa batakafa Yamalax denoxa solwickir, lize kadimeon preyutason koe danca al koisker, gralometeson va kota snavolinda iku zveriinda.

Bat goaspil va salt ke inafa rietera ataler. Toz dankagar da bresitol tir nariyin koe ikse, da va alma direvielon lusteter, nume da gan guazya me zo balieter.

Taneaf biotavordig tauler ise va fentaf miel ke fentugal remstir viele Makar va renga kolanir. Vere pu guazya dokter da bresitol koe ikse tigrir. Al vulkuckur da kurenik va meki ruyatki doon al ulir, dume zo akoydapar viele nekev dean warzotany va nugarapa malseotar. Ko ilava kerujon senyar, vox kalianson larde va nubokara ke kurenik ko ge vol rovokazawar.

Bak bata nyalera, vamoe jorus Tcalgan, fawokaf biotamam azenter ise va santara rem vibongukaf badeem ke miel lumiskon divatcer.

## IV

Makar koe ilava senyer. Inafa taka anteyawer, koepak teyer. Aotceks dem lavajeb is olaxa tizon koe litceem pridur. Jewesa nolda ton fentapaf salt moo tcoreem vantraspur. Oltavafa voa kevo ge titnid.

Guazya folir da in keniber. Neke me. Utsala ke bresitol va inafa kimtafa keraya veber. Re folickir da sulem tir nariyin, koe tele ikse dace tagelton rodasugdar. Va bresitol wir, i va in seluyun leve gamiaf empor is suxas va nolda kan kotceem ta tunuyara. Taelolya remstisa va vafi mikaci va inaf moavukaf im jebesid. Inaf iteem yozdar, va tel ke Makar aneyar.

Makar gitaker. Tit ilava grabler. Van sagafa Lisanka vultar. Ko aalxo djulanir.



Voxen tokcoba fepoar ? Kas xuye pof meem ke guazya va in ben bergok ke myotxa vannarir aze ko ilava kadir ?

Volgue, dive wida ixam tigr. Mujeem ke impadimot formason kilder ise moe tuolgayana nolda dwedad.Tcalgan kadimeon tigr, ixam ilon.Biot ke uja ilamkon mamar, azen, vamoe ebeltafa zidaconya kevaxawesa moe aftafa azentekwa, orikafa brucka ke yakutaf okollakisik dem ontinafi opafi edji awid, dum talara ke jontiki zveri.Kal uja lanid, ampud.

Ixam tael titnir.Ticeon, tagelton mirastion, batakamaf rujodam awir. Ton afistafa is betawesa afida jeber. Laizon, nusollipawer, nutumantawer, nuroidar. Jonukafa teyolya kotliz malon bimiled solve lenteon likon ivamuf sfiaf rujod tutapedawer, kotveraston loloon ebeltaf, orikaf loon dam aalxo liz Makar fu kolakir.

Tore koo jotafo is vafo aalxomo kelda tir vristafa. Vokeon venta tigid. Voxen darpeda Makar abdulakir, aal tugijawed, aalxo loon tuelkawer, tugovitawer, ton divulgafa listuca kum santara is amlitara. Letafa gama tid dem anamplekus moavukaf fentsel is myotxa. Afidanya ke vanawalt va vafa vokliba ton afiasa tamka dile remstir ; bam va koton batakafa senta ok buxan yup ke kon aal koafir, i ke kon aalaf gulik daykes moe sid bro awalkoda koe noldafa koxawa... Batcoba slamar azen aalxo ko stivawesa is bulafa orika gin kaluber.

Makar vukir.Banlize, riwe drume kelda, iksebolck al zo deraykar. Afistafa afida va anamefo karnizxomo solwion koafir. Makar va taneafe ikse dace kozwir : dem baroy gamiaf abrotcaf trink windeyen keve xuf nuk is giskin gan esafa skelaxa dem konaki madasikimi sinton dikisi va afoba kum yinaxa.

Ae bate ikse va in me pasud voxe va bresitol soe gilebidud. Makar va impadimot blion volrundanyar, aze, iskeson va grufa Lisanka iste kelda, anamterektar.

Mek lor koe aalxo.Ant mamara ke kristnazbalaviel re ilon mal wida koe aulaf miel wan tauler.

Makar va mecoba gokivar. Pilkotik ke batyone ikse tir Alyocka Tcalganov, i vegungik is volnapik. Voxen koe uja batedje tce tigr. Cufa welma ke nolda sure lubeyesa va meka conyuta ruldar.

In va vafi mikaci istlanir. Va mecoba. Nolda leve bora dwer. Inaf empor tid emakoraf, va kesi buli dem amlitasa garizapa vektad.

Kotliz wan exuler. Ware va mecoba. Bam van kelda dimon lanir.

Voxen kay !! Kactarama... Blakeramaf im kaliaf dum koafima koe aalxo va afiackano is pokepafo xo remlanir... Makar va opaf oblakeem ke bresitol solwickir, i ke bresitol dem vaf ault talturonon botcewes dum djujupas va onkara ko istak ke aalxo. Sulem wal ulim griawir, vanvulteson va ikse ke Makar, azen vanion cufa odjaca koe aalxo tauler. Lorara taneon madjafa lev galza ke aalapeem azon arstaksewer aze ko sumefa vosta aulon eglur.

Takra ke Makar toz dendaweper.Tane inafe ikse su luber.

In rem mikaci ongir. Gama va iteem ustad, va fentapafa nolda kev gexata botced. Ardeotar, ilgaeler.

# KLOKARA KE MAKAR

Ixam koe binka dire inton fenkuyuna tigrir. Aal batakar gu elada vokeon ranyed ; kabdueon keldama tir vristafa is loloon nilafa isen arteon gariza ke iksepe tsabuson fenkuwer... Ware konaka bora...

Voxen moe mila binka, poku ikse, ayafa vola gepoyter aze vere griawir. Disuk va yona pinta is altoza biwe rovannarir. Wori Makar va Alyocka Tcalganov su kagruver. Va xowaso alnafo altomo is rupolafa laniga al solwickir. Orikafa vola ke Alyocka dace al nutir orikafa loon dam gubeon, kutceem al nutir loon ontinaf keve talgapeem.

Exukera ke Makar tir gijafa is purafa. « Man jastrik ! Vanmia jinaf ikseeem gozar ! » Ae kore Makar va ikse volke int sure al kodisuker, pune batcoba me tir mila isen amidaca sotir... Bata amidaca tir : viele in vanmiae ikse ke Alyocka al gozar, pune vol al zo djupokonser, solve re kozwison va diveik koe tele dalintafe, pune va situndara satoler miledje va moxasik va dalintafa roka djumester.

Moo tela lotrelafa kelda rem mikaci van lubesiyine ikse vulter. Bresitol su zo narir. Voxen viklason dum rupol dere Alyocka va bato xo vanlanir. In fiste abdion gonartlanir.

Va empor lubeyes moe sid tere kallanir. Va valeveon blakeraf im ke govit ol kozwir. Milinde male ilava vomion al wir. Bresitol va nolda kan kotca suxar, ton afif is lujaf iteem va in modisuker.

— *Titima* ( me uzal !!)... ke jin ! ~ Makar pu Alyocka iegar.

— *Titima !!* ~ puda ke Alyocka dum kro dulzer. ~ Ke jin !

Sin toloy, miledje, vozeson ampuson, is latigison abdu sint, va trink toz levmadad tunuyatason aze tunarison va govit ol. Moi kamadara va trink, bresitol upenyar. Welver aze vukir, nuleson disukeson va toloy volnik ke Tcalgan, aze takaskarason va bakaks nope lubera ke iksexinta friner. Azon itupon otcer, dinon aultzekason.

Alyocka ongir ise onkar, voxen Makar va ina ben bopi ke lioza kadimuon vannarir.

— *Titima !!* ~ iegar. ~ Ke jin !

Aze kadim conyuta ke bresitol ongir.

— *Titima !!* ~ puda ke Alyocka dum warzafo kro gin kalir.

Azen Makar silukon pestaler da ben lioza zo konubar edje Alyocka abdueon laizon tigrir.

Makar mibuegar. Va bresitol vulkur aze kadim Alyocka otcesa iper.

Loon vulted, pune loon kalion askid. Gama ke klupa va Alyocka basedjir nume va gom mo sid mimar. Makar, onkason is yatkon kizoyuson, fu dapnarir. Voxen Alyocka kotvielu sotir vepokafa loon dam Makar. Levgon vukir, rwoder, takatitalason. Makar kevu jivot kev vakor klantawer nume ko nolda tramkewer. Sonakana Alyocka van Makar tanamus xowar aze va inaf gom konarir aze ko aalxo griawir.

Makar vion madagir, ton levempayan beweem, volkalapaf is tigris koe aklafe swave. Ikatrakul !!



Makar vion madagir, ton levempayan beweem, volkalapaf is tigus koe aklafe swave. Iktrakul !! Bresitol riwe koe inafa nuba su tigur voxen re... Va aultzekara ke govitokoe orikafi mikaci cwe wir azen moi bata bocafa beonaca parmon griawir.

Orika loeke dur. Batakamaf rujodam ke mirasti vion solelawer, tir nemon rowin. Malstisa olya tujukewed, cuesa, prelkasa, volaftafa.

Vultera va alto ke Makar al tuidular. Nolda ton fentapaf salt konis va ewazalt kevon jewer, va bergok ke lioza anjed, kevo ge kevtraspud, va torbas vukuda tukotrad. Va gom ilbureyen gan sonayana Alyocka mea dadir. Luxe tobeem, bak vultera al drasur. Me gruper liz di rokatrasir. Debala ligundewer. Makar sogrupe da fentars gu kontan lanis ko aalxo a edji is tobeem somekrander.

In jontikedje lanir. Kare patavara dive Yamalax valevion ixam co gotigir nume va biot co gokozwir. Neke koe vokeon aalxo wan tigur. Mikaci nuve puon co diwedayar nume koe intafu diolafu ivamu co kagir. Sumeon fawokafa mamara ke biota wan yarter. Makar vanon en folanir, neken mamara nutir loon ilafa darpada dankasa drivara ke biota lolodaxon artstid.

Piksa va takra ke Makar odjon tolgenir ; cu anzar, tir rusagafu. Nimateem vol djupezanir ; beweem empawer, kranaves is gamiaf ; in zo ilgaelesir. Nugeem is nubeem tuglagawed. Miluntivamuxa tuidularsana va inafa lebafa taka cwe anamlicad ise kladad.

— Cwe tí eglusik !

Bata rieta toz vonewer aze koe keraya ke Makar belon dun dilizer ; neken in wan lanir.

Aalxo guamlitawer. Ton teca ikorafa giuca kadimeon budewer, aretlason va kota ludja is elekason va kota pokolera va giwara.

— En tí eglunik, ape ! ~ Makar wan trakur.

Tere po va in koton relmer. Gama ke jotaf aal jlokon is volvusteson ustad dumedede co djuvoidad ise va inaf sokaj co djumimpavantad. Abicedje, bata kaf libakol ko senta gepoyter ; mo vadinieem debanyar, va oblakeem dem ebeltafa kretsa keve otsa zekar, aze tcateson tori Makar eskarnon konejedar. Batinde sugdalar da grupecker da in tir Makar, i miltan koinkes va kota deinda ta vilara va dalintafa katca koe aalxo. Voxen re va in nuleper.

Makar nigeper. Neken aalxo loon toz blizer : loloon tuplabawer. Re aal, don tel losumeon tigus, ba inafa pokolanira va abrotcafa gama sotced, va in ben usuk konugad, va inafa gexata dendad, va inaf iteem fezad. Lambey va vask divlanid, ton anamkaf is rilatf iteem va in modisuked.

**Klokara ke Makar**, ke Vladimir Korolenko ( 2<sup>e</sup>eafa zixa is wana ; diza tisa koe diref otuk )

Klokara ke Makar, berpotam (1885) ke Vladimir Korolenko rossiaf suterotik  
Xanto : *Сон Макара*, rossiafon, kalkotavayano gan Mixail Kostov, 2008.  
Dotay : Kotavaxak dem Suterot.

Robelin banliz : <https://fr.scribd.com/doc/305871177/Klokara-ke-Makar-ke-Vladimir-Korolenko>





**Edvard Munch** ( 1863-1944 ) ~ Norgaf lingsik

Edvard Munch tir norgaf lingsik ise gu tanealik ke muxareva koe witafa lingeropa zo torigir. Wavepon tir kotgrupaf gu tira ke warzafe yambafe sare koe Germana is Istefa Europa, numen inaf grabomeem isu zolонуca koe varafa tamava re zo kagruped. Losposaf grabom ke Munch tid tel ke 1890<sup>e</sup> sanda, tulon *Iera*. Inaf kaikif warzeks soe loloon zo koobrad ise va ref yambikeem nukoswad.

## Jotugal

Munch ba 12/12/1863 koe Løten koblrir. Koe norgafu kelu banugale yoltkirafu gu Christiania atrir. Christian Munch gadikye tir sayakaf selaropik alkupus is morus. Gadikya nope kotcakola mulufter viele Edvard oxam tir alubdaf. Berikeem axon galer. Sophie berikya dum gadya nope kotcakola mulufter ; lojotafa berya gu « misapa » kalion zo reser. Andreas berye ba barsanda dere mulufter. Edvard va ewava ke akola ik awalk ik kexuca loviele dimfir.



Munch dene brubefa olda tandon vayar aze va yamba ekemon ektudar. Va yon savsaf feliik vayar, dene gazaf yambakizey va tavera va zovdana lebaca toker, ise gan Christian Krohg kotgrupaf tuwavevik ke bane sare lanedje zo suzdar. Inaf taneaf grabom gan francafa geltreva zo kodororad isen kalion nijur fitcon grutepes.



Bak 1885 Munch koe Paris trelon jonvieler. Bak mil ilanacek va Akoles rumeik gorikafa trutca toz kobaver. Bata to tir Sophie berya. Edvard jontikedje vaon kobaver, aneyason va taneafa litera is muxara keldaskisa va remlingera va man kranavesis ilkaf bagalolk. Va darkalum is kloyatazuk levebgar nume va buneks obas va brija ikatcur. Welma ke trutca va sugda ke mefakafa redusa diotera nedir. Malyopasik di tid fimapaf.

Nelkaf grabom ke yon direfa tanda icde tazuk leon pistoled. Inger moe piluda bak 1889 va defrera ke Munch ta kaatoera va nyabaf alpoz nedir, milkeldon gu warzapestakeva ke bane sare. In koe Åsgårdstrand va bata trutca linger. Vristapaf biradom adalaf gu bana gola di tir sugdalasa taruva ke jontik inaf lingeks.

## Hans Jæger is jonvielera koe Franca

Bak 1889 Munch va delt va Hans Jæger norgaf sutesik va Yona nakila ke sakiura ke Christania tulon linger. Nobara bak toleafu acku ke 1880<sup>e</sup> sanda va Jæger is rijay dem mulaf arotievik tir gorukafa darima ke blira ke Munch ise tir klita ke betekera is koefa koboda. To banugale inafa mivizvasuterotafa warzerapa tozuwer. Bat taneaf zovdaks ton « ruper » va amidafa idjafa dandara ke 1890<sup>e</sup> sanda guyunded. Seylon gu rieteem ke Jæger, in kan gralomera cugeke pokefa is sagafa, va kultos is arga ke witafa blira djuremlinger : va « intafa blira » djulinger.

Bak muvugal ke 1889, Munch va wonarapa va yon grabom koe Christiania belundar ise va yambikaf filavcek gan soka mbi kserar. [...]





## Recela 6 : Fujisawa

Recela 6 : Fujisawa tir pereafa gweta ke sposaf gwetak vergumveltkiraf gu 53 recela ke Tōkaidō vawa ( *Tōkaidō Gojūsan-tsugi no uchi* ), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo ( re Tokyo ) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta ( *Ukiyo-e* tazuk ) tir lumkirafa gu 37 × 25 cm- ( ton *Oban* breviz ). Tir teveafa ke enk ise va greelt koe Fujisawa kaatoer.

### Greelt ke Fujisawa

Fujisawa wetce greelt ke Tōkaidō vawa bak 1601 zo exoneyer. Fujisawa tiyir trigafa widava tuke tigira ke dalafa dopewa ke Ji viray ke niponafa buddeva.

Gweta ke Hiroshige va wida dem za neder. Koe radimazenta Yūgyō-ji dopewa moe venta tigr isen kabdueon torii tuveli dem kelda stasa van Enoshima tigr. Za gan befoltik zo tervar isen balemoy wiiskik nulanis van Enoshima Benten tumtaxo va sint kene kuksama radimelanid.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingsik  
( 1797-1858 )

Varaf teliz tigris koe Kotava Xadola dene Wikipedia.

~ Banliz [https://avk.wikipedia.org/wiki/Recela\\_6:\\_Fujisawa\\_\(gweta\)](https://avk.wikipedia.org/wiki/Recela_6:_Fujisawa_(gweta))





# TAMAVA IS TAWAVOPA

## Gorée, lecewala ke levetirikafa butcara

Gorée ewala ( 14° 40' 01" L-, 17° 23' 54" R-) tir ewalama ke lentefa Atlantika welfa, koe Dakar ceda is lente kelu ke Senegala. Welmot tir vas 0.18 km<sup>2</sup> isen sanelia vas mon 1800 irubasik. Tiyr zolonafo levetirikafo butcaxo bal rematlantikafa butcarugal.


## Sedme UNESCO

*Grocelon ice krimta ke Senegala, lente Dakar, Gorée wali XV<sup>eafa</sup> decemda isu XX<sup>eafa</sup> tiyr telo lozolonafo levetirikafo kazaxo ke afrikafa krimta. Ewala stujejena gan portugalik az nederlandik az englik az tere francik tir ton kevaxase tadle dem orikafa levetirikafa revava is glabafa mona ke kazasik va levetirik. Gorée ewala re wan tir leca ke ayikafa savera vox dere tumtaxo ta dimnepalera.*



## Izva

Gorée tir dem meka elupkafa sanelia viele portugalik bolkon kosmas va afrikafa krimta va inafso saktaxo guon askid. Wolof saneik ke tadava va ewala ixam al yoltad ( Ber ) vox moe bata laviskafa raporka me djuminked lize ostik sid va midura me katir. Volson europik va lazavanya ta zavzagira diked : ewala tir tuwafaf folk isen inaf tazuk va bravanya ta gondara ke tota firvir kire gu utardcekup zo nendar isen edogeiskafa piluda va drikafa divtotara nover.



Gorée vanpir elupkafi vefaki ke geja wal europafa patecta. Kevaliera toldecemdon jihar isen vexeem opelaf : artlapira az mosidara az vilara va folk is veveduks ke daref kerelesik az kolnara va pilkafa trumindara yoltana vey vo, az acagirama va dimlapis volnik bulis az mosidas az anamvilas akz-Batdume me destat da katcalafa stabrega ke bane tuskaltayane sare mea tid ugale portugalik is xollandik is englik is francik va digira ke ewala gu sint lyumayad, vaxe pilkaf yolt ezbayan koe gopa ke savseluxaxa : Oranje folk isu Nassau, Saint-François folk isu Saint-Michel... Soe tanoy yolt al ticfir : nederlandavaf « Goede Reede » nekitis « Gorée ».



- 1) Xollandaf zovdom va Gorée ewala, 1765. Saint-Michel folk isu Saint-Louis zo rowid.
- 2) Ref wiks va ewala is kolneem. Male Castel folk varoneon tigis.

Bak 1677 debala loon zo tuaftar. Estrées rambik artlapiyis az buliyis az mosidayas az vilayas va xollandaf folk akz-, va Franca moe ewala delon inker. Antaf elicapik zavzar Engla : remi rekola ke XVIII<sup>eafa</sup> decemda, ewala balemon tiyr englafa ise alubon francafa. Soe koton anteyasa is anamvilasa nizdera adre zo jovleyer.





XVIII-eafa decemda en tir « moavafa decemda » ko Gorée tiyir, ton vonerapa nekiyisa va ref kolmeem. Nuda zo conyukad, sanelia tukulana va plinafo yasaxo kolnar. Tir ugal ke « *signare* » lerkikya tisa ageltuca felisik va ewala. Solve lerkikye tid stolenik ok dodelik ok birelik, pune lerkikya nendana gan francafe ok englafe « yerumanikye » tid trigafa ise dirgackad.

Wori izva ke darpef kerelesikeem va ewala, i tela ke kolnasik is kazasik me tir tanafa izva ke Gorée.

Ewala dere tir butcara is levetiruca is malburera is volbagaliuca is mejera is ikuza is xonuka. Aryono xo koe Afrika va koolanira ke lo levetirik malburen kal Amerika al wid, voxen abicaró xo va koinga ke bane sare lisagon wan vided. Tev kunoy oc ke Afrika remi toloya decemda ko grenyafa levetirikafa tota zo stoleyed. Koe Gorée, kota bora koo nuda ke rekeugal va dilizeyesa relkafa kazara wan kimbar.

### Diola ke Gorée

Lana diola rotir nekina gan awalt tekas va izgik ke darekeugal, is gan agramuca ke irubasikeem krulder. Vecara ke ewala tir vey inafa rotira ta moticara va duxara, voxis grutera va radara va menuxapafa vanburera ke coseem kereleyes va ina. Guazik ke ewala mekiceson dile kareizud da lan adomtas norlik, i Mame Kumba Kastel, va Gorée rubar ise gu kota dratcera va inafa gloga nendoyer. To Mame Kumba Kastel tulon nuve tatceyer da francik va kevba gokagluyayasa va ewala gu tadava rotenukeyed, numon suson va auluca ke Gorée kev boluca ke kelu.



Nuda koe Gorée

Taniafa verzanuca ke darekeugal do rekeugal is ke izva do vieleuca tir tanara mempera ke Gorée. Mona va Gorée kareizud, voxis rumeik emudes ba kota artlapira ke likay mal Dakar is dragesa va worara va ewala. Sin va lekeugal is gelkeugal grupenyed ise va meka evla isu bulira vultud. Videsik va « levetirikxe » luxeon osk vider voxosk blisir, va darekef izgik frofar. Isen mepulvis korik tid neke to vrutasik ke darekeugal. Bata guazikya ton mil vageeem dum abdigadik ta mista lanid, dimfison ba tanoya darekefa decemda ; bat opelik renas va intafa ewala fereon mebuluyuna mali jontika tanda rotir kiren inafa yasa mali baroya decemda banlize dun soker ; bata yikya bal jorapa re tubliasa va vigama ke molt gu *signare* va int ware efud, epuyuson va ribiegaf gem ton talgukay. Kotbata tamavama blayakiskon is meviagon vrutackar.

Gorée ke rekeugal gu darekeugal va int vandelvejackar. Lubeyesi raporki ke folk ta kolnara va aryona vreda zo zaniyed ; savaafa permexa ke Castel folk gu kobaxo gan lingesik is yambik ke Gorée zo artazukad ; mefavlafla buli gu sanegafa starka zo dewelled.

Bata guazafa zijnya tir meropestalenon kexafa ke bliyipis tisik. Voxen Gorée izvakorapafe me awalker. Va jontika tuskaltayana rekola isu vantenusa, i va jontika akenafa rekola al gruper maneke me folit da mevielu titir lan setikeks ke tamefi nami.



Cugexa kimbasa va tena ke levetiruca



## TELIZ

2<sup>e</sup> bu : Vogelherd arula  
2<sup>e</sup> bu : Kotavaf Izvugalayak  
4<sup>e</sup> bu : Klokara ke Makar, berpotam  
8<sup>e</sup> bu : Edvard Munch, lingsik  
9<sup>e</sup> bu : Recela 6 : Fujisawa  
10<sup>e</sup> bu : Gorée ewala  
12<sup>e</sup> bu : Liwombura  
12<sup>e</sup> bu : Kuda ke Aisopos

## Kotavusa virda

Virda kotavon sanelayana, nuyon is faston  
romalvajana is rorubiana is rotamzilina.  
Ickriluyun rokeem. PAG / DE.  
Internetxo : [www.europalingua.eu/KotavusaVirda](http://www.europalingua.eu/KotavusaVirda)  
Bu : [www.europalingua.eu/KotavusaVirda/7-e\\_otuk\\_05-2023](http://www.europalingua.eu/KotavusaVirda/7-e_otuk_05-2023)

Sanegara : Alubeaksat ke 2023. 7<sup>e</sup> otuk.

Yunkeks is ewava : ewaveem abugaf gu roka ok  
nuyon rotamuzen ok rictayan gan digisik.

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>

4

Loma  
SULEM

ARTO

FR  
patte(s)

## Inia / inieem



**Inieem** : inia tolakoron sotid solawesa  
bewa jupasa va lanira ke jontik sulem.  
Koti iniaki va aptaf yolt gidir. Ota ke inia  
sotir amidafa gu katca.

wilt - ault - pujek - inia - oral - bruxa

## Wegidol is Zeus

Wegidol, rabateson da jaftolye va int gu noleem abdivodar, djumar nume dere lion roseotar.  
Batdume va Zeus kevlanir aze bliker da in va noleem di kozilir. Voxen Zeus, pan da in va int  
gu ontinaltopo is po me keldaskir ise ware loon galper, osk va loplekura va noleem vewar,  
voxosk va toloyi oblakaki dace gaber.

Batinde jontiktan warkon is djumason va artan disuked, me vofad da va intaf gunteem  
drasud.

Kuda ke Aisopos, -VI<sup>eafa</sup> decemda ( kalkotavaks gan Yurani Andergan )

